

# 1 PITA

Pita yio Jisis siir kigna miriian inkam nwrkin. Mi ta yokwowa siya winkika iikamim Jisis siiram naingwo tibmiiyim mi siir yai aiiram wakaeyokna apiyim simiiram. Pita siya minam winkikin iikamim naingwo tibmiiyim simiir kinsiis haiginiuwam, dimusi rani iikamim naingwo tibmii karamae nwowiyim simiirin hik sima hauugim. Pita siya pi boriisopi sima simiir naingwo tibmiiya Jisis siiram naingwo tibmiiya sair haiburgigim siya ha naingwowi saeya hiriayar dwokripkai mi hik hiriayar hai. Iriig.

## **Biigibiiyan yokwowa Pita siya winki aeya**

**1** <sup>1</sup>Kara Pitakin, kara Jisis Kraisiir aposel inkamkin mi ta yokwowa kara winkika iikamim naingwo tibmii kiiiniyim Adi Komii krimiir Wanin siirim kiiimram yipiki biiya, biiyan iikamim sim nhinikriropkiyim kiiim nu maeyau waraurankin mi kima ha namim mi kima kimidiniya ti omim sim ini owou, Pontas, Galesia, Kapadosia, Esia mi Bitinia. Wim kima ini inkamim yipiki hindara nini boinakiiyim iki om nhirim sim mi ha swoki amiyim simiir oma hiriir ini simiir hiriinan ywowim. Mi ti hiriinan siyu kaimwoin, wim kima ti om iirin wi ii priei nwo rani mi mhoyiya kima wi kiiim omkiomin Adi Komii siya nwowin wi siir nwowi. <sup>2</sup>Kiimirin Adi Komii krimiir Wanin siya bidi yimbiingiyim siir iikam nwowim. Dimusi rani, biiya siya bidiyar yinokninkinin mi siya hiriinan bidiyar mi aingwowin kiiim kwoinim wi rirmiiya siya nwowaiginuwi opa dimin taemin hinda kigiguskiya sair hiriinan. Siya ti hiriinanin siir naeyuni tirkin mi ta hiriinan sairsika kima wi Jisis Kraisiir yai imiir nwoke wakaeyokna apim mi siir nhieya kiiimirin dimin whirki kimbu karamae saeya nwoka. Kara ha naingwowi Adi Komii siir naingwobumbuwa wi kimakar nwowi mi kima wi iripar nongwomamair aei. Kara ha naingwowi siya ti dimin miyik miyik imiirin wa tiri kiiimirin mi simiirin wi idwo idwovar nitkin iinainami. Iriig.

## **Mhoyiya krima Adi Komii saika nwowi mi krima wi digworaekwo miyikmiyik imiir haii**

<sup>3</sup>Krima Adi Komii siir inig iirarar hainanki yipiki krimiir Biiyan Inkam Komiin Jisis Kraisiir Adin. Dimusi rani, siya krimiiramim

nhami nhami bi naingwokwonanaekin mi siya siir naingwoyimyoka sairin warar mi iisimauu krimiirin Jisis Kraisi siirsi yipiki biya niki aonamin mi siirin Adi Komii siyar swoki hidninsiin idwo omwai swoki waiyamin mi tariinanin siya ini omwaiyar swoki waiyan. <sup>4</sup>Mi nim krime dimin taeminim Adi Komii siya hauwanim krimiir yipiki wi krimiir kwoin imiir whinkinsiis haiginiuwi simiiram nwokwokini. Simiirin ini siyar kigriraowim siir om hirar mi simiirin wi tioidwomai rani, sima wi wadie hiriirar nwokripkaigiyami. <sup>5</sup>Ti digworaekwowim yim iikamim yipiki naingwo tibmii kiinim yim kimiirgim mi simiirin ini Adi Komii siyar kigriraowim. Dimusi rani, siya kirie komiigakin mi simiirin wi kirar haibudwini mi ti digworaekwowim yim wi Adi Komii siyar nanaakninkiihaiginiuwi ta iya Jisis siya swoki itana kimiir nanmaiwarkaina iuguskiyana wi sair nanaakninkii haiginiuwi.

<sup>6</sup>Dimusi rani, kima wi maigimaiga ti dimin taemin imiirsi nwoi tiriiginim ta ii aiir nwowim sima hik kimpipisu kimiirar hauuga windi kima maigimaiga nwo karamae kipi nwo ti dimin taemin imiirsi. <sup>7</sup>Mi ti digworaekwowim yim wa nimbimbiiyami mi wi ta hiriinan sairsi kinankiuwi Adi Komii siya kimiirin kimiir naingwo tibmiya ini panin panina namisi owa kimiir kwoinaw nwokaiya. Mi iikamim golin paenau kabitkaigiyim mi sima pa niki obriprigii mi ti golin pi opar nasae imbiyami mi sima dimin biyeyim iki siir idwo hir nwoyiyim pa nitnoudnankaigii mi hapaiirin pi golkigolin pi sasar nwokii. Mi ti hiriinan siyu kaimwowin, Adi Komii siya dimin biye imiiramin asi kiwakii krimiir tumbuninkin haiginiuwamin mi ta hiriinan sairsika ti dimin hiriinanim yim wi pi nitnouninkiigii mi wi dimin kibi kibiyim sima simar nwokaigii krimiir kwoinawin mi krime wi Adi Komii siirgisiiramar naingwo tibmii kiin iski. Mi ti dimin kibi kibiyim kimiir kwoinaw nwokaiyim yim ini gol imiir haiburim. Mhoiia ti golim yim wa digii mi wari diminim kimiir kwoinaw nwokaiyim yim wi wara digi rani. Mi mhoiia Jisis Kraisi siya swoki iti mi siya, siya siyar swoki anaakninkinaei mi wim kima wi inig komiigak hainii nwoi mi Adi Komii siya kimiirin wi hiniina boini, kima dimin whirki bi kimbugim. <sup>8</sup>Kima Jisis siir bi kigim mi kima siiram naingwokwonanaekim. Tariinanin kima siir bi kigim mi kima siiram in wakaeyokna apim mi kima ini maigimaigar nwoyokiyokiyim mi ta hiriinan sairsika kima wi hiniina boin tani sair kirieya paninga <sup>9</sup>Dimusi rani, ta hiriinan sairsika kimiir naingwo tibmiya ya hiniinga, kima wi Adi Komii saikar nwoi yipikin kimiir nanmaiwarkainan.

<sup>10</sup>Mi ta nanmaiwarkaina ta biya biyan profet kamim sima sair naingwokwonanaekim mi sima bi sibgu inokninkin kiingim. Mi sima kimidiniya naingwobumbuwa mhoiia Adi Komii siya niisimauuwana sair winki mi ya tariigina ya nikrani wim kima wi ta nanmaiwarkaina

saiir haii. <sup>11</sup>Mi sima ta Adi Komii siya nanmaiwarkaina krimiir saiir saiira naingwokwonanaekim mi sima ini sima simar yinsrii ansriina ti dimin taemin imiiramin. Mi ti Kraisiir naeyiuin yipiki simiir hir nwokaiyin simiirin siyar yanaakninkii haiginiu iya Kraisi siya nitana saiirin mi dimin taeminim ti ii imiir nimbimbiiyamim iya Kraisi siya haiya hik dimin biyie biyeyim simiirsi mi mhoiia siya wi inig komiigakar nwowi. Mi sima ti diminin siir siira naingwokwonanaekim mi siya wi paniin paniina nimbiiyami. <sup>12</sup>Biiya Adi Komii siya simiirin hiniina niisimauugin, ti yayim sima boinmimauuim yim wi simiirar swoki whinkinsiis haiginiu rani. Mi ti dimin taeminim mhoiia iikam kimiir whinkinsiis haiginiuwi yim ti dimin taeminim ti tariinan nwowim sima warairgim, yipiki tiki kamim Adi Komii siir yai aiir boinmimauuwim kimiir, sima boinmimauuwim. Adi Komii siya yikropki siir naeyiuin simiiram mi simiirin siyar whinkinsiis haiginiugin mi sima ti dimin taemin imiirin asi boinmimauugim. Mi paekwosimim yipiki inkam nwowin Adi Komii siya nikropkiyim ta mii aiir miriiyam mi yim sima biiya ti diminin Kraisi siya tiranin siiramar mi naingwokin siir mi inokninkinim mi sima ini yinkinyaeyaowim dimusi rani, Adi Komii siya simiir bi boinmimauugin. Iriig.

**Iikamim dimin miyik tiriyim kimiir kwoinim  
yim rirmiiyar dwokripkai**

<sup>13</sup>Mi ta hiriinan saiirsika kimiir kwoinim kirie hiriir dwokripkai mi kima kimiir siyu iirsiyar mintirao mi kimiir kwoinim sibgu sibgu daingwo omok ta naingwobumbuwa wi mhoiia Kraisi siya hauwi kimiir saiiram nwokwokinim mi iya Jisi Kraisi siya swoki itana siya wi siya siyar nanaakninkinaei. <sup>14</sup>Kima Adi Komii siir wakaeyokna apiyim kima yinisimin siir ad yopiiyo sowiir yai imiir wakaeyokna apiyin siir hiriinan dwo. Mi ta ii aiirarin kima iki dimin biyie biyeyim biiya kima tirim simiiram kipi naingwokwonanae iya kima Adi Komii siir ninokninkin karamae nwowa saiir. Niingaka. Ti dimin hiniinim simiir tiram kipi naingwo. <sup>15</sup>Mi yio haniingi niuwi kima wi Adi Komii siir hiriinan nwowi yipikin kimiir kwoin imiir kiyaiiyin siir dimin miyik miyikim simiir haiyam. Yio siya ini dimin whirki kimbu karamae hiriir dwokripkaiyin mi wim kima iriipi hiriinan dimin whirki kimbu karamaeyar timi o wari dimin taemin whiekakim kima tiriyim simiirin. <sup>16</sup>Kima ti hiniina tir. Dimusi rani, Adi Komii siya siir Yokwo Komii aiir winboinkiyin siya ti hiniina boinkikin, kima dimin whirki kipi kimbu. Dimusi rani, Adi Komii kara dimin whirki bi kimbugin.

<sup>17</sup>Adi Komii siya wi iikam whiekak krimiirar hidirkaki mi siya dimin taeminim krima tirim wi simiir hiriinanar swoki tiri. Mi ta hiriinan saiirsika, wim kima iikam yipiki siirin hiniina dapikiuwiyim Adi mi

siirim kwisboinkiyim, kima, kimasiyar mintiraona dimin taeminim kima tiriyim iya kima ti nu iirar niki owiyim, yim Adi Komii siir kipi tir big nasmirwaiya nwo karamae siya nwowim kimaka. <sup>18</sup>Kima ti dimin taeminim kara boinmimauugiyim simiir tir dimusi rani, wim kima ina ninokninkinim kimiirin Adi Komii siya bidi yanmaiworkainam dimin biyeyim biiya kima tirkaiyuwim simiir hirankin, ti diminim yipiki biiya kima nonkwowim kimiir brougae wanwiyaeyim sima niisiisimauuwim kimiir. Adi Komii siya kimiirin silva, gol minmi bi saininiyoknakin. Niingaka. Yim ti dimin hiniinim yim wa tioidwomaii. Siya kimiirin Kraiss siir nhe kibi aiir nanmaiworkainakin. <sup>19</sup>Siya ini sibsibnan ywowin siirin whaigomkosimki bi pisrankin mi hankak sim bi swoki okin mi dimin whirki bi swoki kimbugin siir piua whauriyinki whauriyinka Adi Komii siir yai aeya boina saiir hiriinan. <sup>20</sup>Mi biiya iya Adi Komii siya nu iir niki onkwokwo karamaeyar niki owa, siya Kraiss siirin saiirar nimbingin tiriir nitamin mi iki ii nhirim mhoiiyanim simiiram niki okin mi siya sasar nanaakninkinakin kimiir whinkinsiis haiginiuwamin. <sup>21</sup>Wim kima Adi Komii siiram asi naingwo tibmiigim. Dimusi rani, Kraiss siirsika. Siya bidiyar iki aonamin mi siirin Adi Komii siyar swoki hidninsiin idwoki omwai waiyayokiyokiyamin mi siya siirin inig komiigakar ywowaiginiu mi ta hiriinan saiirsika kima siiram asi naingwo tibmiigim mi kima siiramar dwokwokin kimiirin wi mhoiia siya nikiunaki mi kima wi saika nwoyokiyokiikaeyami iinokiinokin.

<sup>22</sup>Mi kimiir kwoinim dimin whirki kimbu karamae bidi ywowim mi ta hiriinan saiirsika ti Adi Komii siir yai kibi kibiyim kima wakaeyokna apim simiirsika mi ta hiriinan saiirsika kima kimiir nomiiyauim simiiram nhami nhami kipi naingwokwonanae. Mi kima irni nwirniyam naingwokwonanaeyim wari kimiir kwoinin dimin whirki kimbu karamae nwowiyin siya daingwokwonanae. <sup>23</sup>Adi Komii siya kimiir kwoin imiirin yaeya kwoin win bidi tirkiyin yipiki wi hiriirar nwoyokiyokiikaeyami kima wakaeyokna apa siir yaiya saiir kirieni tirkikin wadie kima nwowamin. Mi siir yayim yim wi wara tioidwomai rani. Mi iriipi hiriinan kimiir kwoinim yim iriipi hiriinan yim wi wari mi digi rani. Wim kima inkam komiini yinisisimkim yipiki nao karamae nwowiyim sima. <sup>24</sup>Tiki yayim yim kaimwowaigim. Dimusi rani, yayim yipiki Adi Komii siya winkiyim Yokwo Komiini yim hiniina boinkikim, iikam whiekakim yim ini konan ywowim mi ti inig komii komiigak sima nwowa yim ini kipnan ywowim. Mhoiia sima wi kowa inkamki tiokisimsibginiya mi ha waiswaekiya wi saiir hiriinan nwowi. Mi kipa ya wa mi houginami nua hiriir mi saeya wa mi bropkinami. Mi ti kamim ti nu iir nwowiyim inig komii komiigakim yim wa digi. <sup>25</sup>Mi Biian Inkam Komii siir yai kibiya ya wi hiriirar nwokripkagii.

Mi ti yayim simakisimaigim krima boinmimauuwim kimiir. Iriig.

**Mi Biiyan Inkam Komiiyin yio ini yinpaenan ywowin mi krimiirin siyar whinkinsiis haiginiuwi krima nwowamin**

**2** <sup>1</sup> Mi kima wari dimin biyie biyeyim kimiir kwoinau nwokaiyim yim ti itnoudninkiigi, ti dimin taemin hiniinim, niksisaе yai, yai iyop nwo mi kwoin bibiyie naingwo mi yai kinaopitkaigai mi ti hiriinan diminim kima simiirin kipi tir. <sup>2</sup> Kima yinisim sapisapin mwiiyaramar naingwowyin siir hiriinan daingwo Adi Komii krimiir Wanin siir yai kibi kibi imiiramin mi hiriinanki niuwi wim kima wi inakamae adiyaowaenan nwowi mi iki Adi Komii siir dimin taemin imiirin wi haniingin sibgu ninomokninkin digi. <sup>3</sup> Dimusi rani, wim kima bidiyar yinokninkinim Biiyan Inkam Komii siya wadieyairgin mi siya kimiirar bidi whinkinsiis haiginiuwim mi kimiir dimin biyie biyeyim yim siya bidiyar mi haiyoprindiyiumiigiyim. <sup>4</sup> Kima Jisis saika damasukikin yio siya ini yinpae miyiknan ywowin yipiki iikamkim sim boriisopin mi Adi Komii siya siiramin nhami nhami bi naingwokin mi siirin siya yimbingi ti dimin biyeyim krima tirim simiir haiyoprindiyiumiigiyam. <sup>5</sup> Mi iikam wim kima ini iriipi hiriinan iyyin paeyinanar mi owim mi ta hiriinan sairsika Adi Komii siya kimiir asi nanmaiwarkainaei mi kima Adi Komii siiram kiwaki kimiirin siir omakanan nwowim mi kima wi piugan kwiruwar mi owim mi wim kima ini pris inkamnan ywowim. Yim sima biiya wraisuim ha nisomsom aokaowim mi simiirin sima biiya Adi Komii siir haigin anag hauugiya sair idwo hir haigin anagi, Adi Komii siir ninkin imiiaeyam. Mi ti hiriinan siyu kaimwowin siirar timi tir dimin taemin miyikmiyikim Adi Komii siirim mi kima wi kimar hauunaei Adi Komii siirin nae ninkinimiiaeyamin mi dimin taeminim kima tiri Adi Komii siya wi maigimaigra nwowi simiiramin. Dimusi rani, biiya Krai siya bidiyar tirkiyim krimiirin krimiir siyu bibiyie imiir haiyoprindiyiumiigiyim. <sup>6</sup> Adi Komii siir yaiya Yokwo Komii sair hir nwowa hiniina boinkika, kara yinpae kibiyin wira yimbin om Saion hiramim omaka hir nwowa sair kougou nwowim. Siya ini ti kougouwim siir hiriinan ywowin omaka miriitim ninansiin okwowyim mi ha boiniyin yio miyik rani mi yio Adi Komii siya hiniina naingwowi yio bimbiuwi rani. Krai siyairgin omaka sair nonkworinuwamin kougouwim mi iikamim yipiki siiram naingwo tibmii sima wi hik mirisikak nwo rani mi simiirin wi siya nanmaiwarkainaei mi wi siyar whinkinsiis haiginiuwi. <sup>7</sup> Mi ti kimiir iikam nhirim yipiki Krai siiram naingwo tibmiyim, wim kima siiramim nhami nhami naingwokwonanae rani mi tiriiginim yipiki siiram naingwokwonanae karamae nwowim Adi Komii siir yaiya Yokwo Komii sair hir nwokaiya ya hiniina boinka,

Siya ini yinpaenan ywown yipiki inkamkin diriraerarkikiniyin omaka miriiyam mi mhoyia pa swoki boini siya miyik rani, mi yio Adi Komii siya siirin hiniina naingwokin siya wadiekiwadieyairgin. Ini siya siyar ywowskiyin yinpaenanin yipikin omaka kougounan omaka sair bopwoniya nokwoin omaka akou iir hougwownam. <sup>8</sup>Mi iikamim yipiki Krai siiram naingwo tibmii karamae nwowim mi digiumii siir haimriiyuim, Krai siya siiyanan ywown mi ti iikam hiriinanim yim wi siya tirkii mi sima wa nhiimnhinkinami mi sima wi sima simar tioidwomai. Sima iikam whaowaenan nwowi mi wa nikii uguski.

Dimusi rani, sima digiumii Adi Komii siir yai kibi imiir haimriiyugim ti Adi Komii siir yayim yipiki biya niki winkiyim Yokwo Komii sair nwokaiyim sima wi digar nwowi simiir tirim.

<sup>9</sup>Mi wim kima simiir hiriinan tani wim kimiirin biya Adi Komii siya bidi yimbinim yipiki siir pugan nwowim mi kima ini Pris inkamnan ywown siir inig hainan prapasim mi kima ini iikamim yipiki Adi Komii siir mii aurrara miriyyim mi mii miyikmiyyik ha miriyyim ini simiir hiriinan ywown. Mi kima ini siir iikamnan ywown dimin taemin kibiyim siya tiriyim simiir nanaakninkii haiginiuim. Siya kimiirin minam kiyai kima dimin taemin biyeyim niibwomambwonan nwoyiyim digiumii simiir haimriiyugigim mi kima siir yai kibiya yipiki bienan whwoyaiya sair wakaeyokna apim. <sup>10</sup>Kima biya iikam niinga nwokim mi tariinanin kima ini Adi Komii siir puganan iikam ywown. Biya Adi Komii siya kimiir bi whindiriraerar haiginiugin mi tariinanin Adi Komii siya kimiirin prasae prasae bi whindiriraerar haiginiugin. Iriig.

### **Krma Adi Komii siir mii miriyan iikam dwo.**

<sup>11</sup>Ti kariir nomiyaukiinim kima ti nuin siir siyuin siir tiran tani. Niingaka. Kima tirin wi ii priei nwonam tani kara kimiirin asi boinonkwokwoki. Iya kima tirar niki owi dimin bibiyeyim digiumii simiir haimriiyugig ti diminim kimiir kwoinim iinokiinokin simar nipiyaokii mi ta hiriinan sairsika kima wi ti dimin biye imiirar wakaeyokna api mi wi dimin biyeya tiri. <sup>12</sup>Kira, kirar diisiimauna iikam nhirim simiir bopwoniya yipiki Adi Komii siiram naingwo tibmii karamae nwoyiyim simiirin. Mi dimin taeminim kima tiriyim miyikmiyyik imiirar diriraerar mi ta hiriinana sima kimiir nainugaugauwi mi ha boini kima miyik rani mi ta sair mhoyia iya Adi Komii siya niti iikam imiir hidam mi ti iikamim naingwo tibmii karamae nwowim sima wi siir inig iirar hainanprapraskii whisarii rani, dimin miyikmiyyikim kima tirim simiirsika.

<sup>13</sup>Mi kima iikamim yipiki kimiir kigriraowiyim simiir yai imiirar wakaeyokna. Dimusi rani, kima Biyan Inkamin Adi Komii siir

wakaeyokna apikim kima gavmanmi biyan inkamim simiir wakaeyokna ap. <sup>14</sup>Mi iki iikamim siya nikropkiyim kimiir kigriraowam mi yipiki siyiu bibiyie tiriiyim simiir donkwoniinwiimwiirnrinkin haiginiu mi yipiki iikamim dimin miyyik tiriyim simiir inig imiir hainan prapas. <sup>15</sup>Kima dimin miyyik miyyik imiiraramar daingwo. Dimusi rani, Adi Komii siya minam naingwowi, kima simiir tirim mi ti inkam biyeyin siir yai bibiyeyim yim wi pi ninkinyaeyaowi mi ta hiriinan sairsika ti dimin kibi kibiyim kima tirim mi yim wi kimiir swoki boinhiuriyiu sran tani. <sup>16</sup>Kima iikamim rirmiyya nwowim kimiirin dimin biyie whirki nonkwo karam nwowim, dimin biyie kipi tir. Dimusi rani, kima ini ti hiniin siyiuin siir nwowim kima Adi Komii siir iikamkim mi kima siir mii aiir miriigim mi kima dimin miyyik imiirara tiri, siyiu biyie wari kipi tir. <sup>17</sup>Kima iki iikamim simiir inig imiir hainan mi kimiir nomiiyauim simiiram daingwokwonanaei mi kima Adi Komii siirsi didid mi siirin dimin whir kipi tirbu maingimairga kimaka nwoisyin mi kima gavman inkam komiiyin yipiki krimiir kigriraowiyin siirin mhii hiinsima dwo. Iriig.

#### **Dimin taeminim Kraisiya tiriyim krima simiir wakaeyokna ap**

<sup>18</sup>Mi kima iikamim yipiki whisarii mii priimiriyyim kima kimiir biyan inkamim simiir yai imiirar wakaeyokna ap mi hik simiir kipi hauu maingimairga kima nwosi. Mi iikam nhirim sima kimiiram naingwokwonanaei mi nhirim io kimaka nwowi, kima hiriyyar tiki prii diriraerar. <sup>19</sup>Mi kimiir biyan inkamim sima wi kimiir nikwowaisii. Dimusi rani, kima Adi Komii krimiir Wanin siir yai imiir wakaeyokna apikim mi kima ta hiriinan sairsiyin yamdi kipi swoki diriraerar mi kima ta kara boina sair hiriinan diriraerari mi Adi Komii siya kimiirin wi maingimairga komiigakar nwowi. <sup>20</sup>Mi kima dimin biyie tiri mi yaowae adim sima kimiir nikhaiginiuwu mi kima ti diminim sima kimiir tiriyim yamdi simiir kipi swoki tir. Yio tiriiginin yio ini ywowin. Dimusi rani, wim kima dimin biyie tirkim mi kima hik haigim. Dimusi rani, ti dimin miyyik miyyikim kima tirim simiirsika mi kima ta hiriinana yamdi sairsi bi tirkim mi yio tiriiginin yio dimin komiigikomii ieyairgin mi Adi Komii siya ta hiriinan sairsiyin kimiirin wi siyiu miyyikar mi tiri. <sup>21</sup>Adi Komii siyar bidi yimbinim kimiirin ta hik aiir haiyam yipiki kara boinmimauuwim kima simiir hai. Dimusi rani, Kraisiya hik kimpipisu prasae bi haigin kimiirsiyin mi ta siya niisiimauuwa ini aknain miyyiknan ywokiya kima kigna apim inkamim huni siyiuin siir kigna apnamiyin siir hiriinan. <sup>22</sup>Kraisiya siyiu biyie bi tirkim mi niksisae yai bi mi boinkin mi siyiu biyie bi mi tirkim. Niingaki niingakiinga. <sup>23</sup>Mi iikamim sima siirin yai biyie nikbumbu boini siya nididim mi siya simiirin niksisae yai mi igao yai bi boinkin. Iiya kamim sima siir tioa mi siya simiirin igao yai bi boinkin mi yamdi

bi mi tiokim siya yaimin yaimin bi boinkin. Siya ha naingwo tibmiigin Adi Komii siya mhoiya simiirin wi ti siyu bibiyeyim simiirsi hidi. <sup>24</sup>Mi siya, siya siyar naonakin paeyin hiiiniya nirioninkin siirin dimin biyeyim yipiki krima tirim simiir haiyim mi ta hiriinan saiirsika iikam krima nu tiran dimin biyeyim digiumii haigingik mi krimiirin wi sima nipiyaokii rani mi ta hiriinan saiirsika krima Adi Komii siir dimin kibi kibiyim simiir asi wakaeyokna api. Dimusi rani, siya pi naokin mi wim kima wadie asi nwowi. <sup>25</sup>Kima ini sibsibnan ywowim yipiki inkamki naingwo ouwougikim mi siyuim ha whaowaeiyim. Mi tariinanin kima ini Kraiis siiram yaingwo tibmiiyim mi siyar kigriraowi kimiir kwoinbud imiirin, yipiki inkamin sibsib imiir sibgu kigriraowiyin simiir hiriinan. Iriig.

### Ta yaiya iikamim nonkwonam simiir boinka

**3** <sup>1</sup>Mi iikamim simiir biyan inkamim simiir yai wakaeyoknaeiya simiir hiriinan wakaeyokna mi wigim iriipa hiriinan, kima kimiir kamni yai imiirar wakaeyokna mi ta hiriinan saiirsika sima Adi Komii krimiir Wanin siir wakaeyokna ap karamae nwowi mi simiir kwoinim wi kima nwoki kiyaiyim dimin miyik miyikim kima tirim simiiram mi ta hiriinana sima wa nwoki aingwo tibmiiyim siiram. Mi kima wi yai yaimin dimin kipi swoki boinmimin. <sup>2</sup>Dimusi rani, sima wig kimiirin wa kigi kima dimin taemin miyikmiyik imiirar tiri kima wakaeyim sima boinim mi ta hiriinan saiirsika simiir mhii kwoinim wa kisina haigi Adi Komii siir yai aiir wakaeyoknamin. <sup>3</sup>Kima simae mikin minim kima kima kipi piuai mwamana, kima iindihop mi yuis miyikmiyikim simiirara nii mi ta hiriinana saiirsika iki iikam nhirim sima kimiirin wi ha boini kima bimbuiwi kig rani. Yio tiriiginin yio dimin komii rani. Niingaka. Kima wi hiriinan kipi swoki tir. <sup>4</sup>Mi ti dimin taeminim kima naingwoyimiyokim kimiir kwoinawu nwokaiyim yim hiinsima dwo mi kipi nikwokrimkrip. Yim ti dimin hiniin ini mikin, iindihop, mi yuis miyik minim yipiki kima piuaiyim kimiir piu, ini simiir hiriinan ywowim. Mi dimin taeminim kimiir mhii kwoinawu nwokaiyim yim mikin, iindihop mi yuisnan tani bi nimbimbiriyamikim. Dimusi rani, Adi Komii siya kimiir kwoinawu ti hiriinan dimin taemin miyikmiyik imiiram naingwokin. <sup>5</sup>Mi ti hiriinan siyuin, biyan wigim yipiki miyikim yim sima minam nwowi dimin taeminim Adi Komii siya boinim, simiir hauuwim. Mi ti hiriinan siyuin sima tirin, yio sima, sima simar swoki tirnakin wadie kigamin mi sima simiir kamim simiir yai imiirar mi wakaeyokna apkim. <sup>6</sup>Mi Sera saeya iriipa hiriinan siyu iirar mi tirka, saeya Ebrahim siir yaimin dimin imiirar mi wakaeyokna apka mi saeya saiir kam iirin saiir kigriraowan inkam asi nikiugin mi mhoiya kima siyu miyik tiri mi Adi Komii siir wakaeyokna api mi siirsi nidid karame nwowi mi kamarin wi Sera saiir yinisimnan nwowi.



<sup>7</sup>Mi ti hiriinan siyu kaimwowin, kima kamim yipiki wig nonkwonaim mi simaka ha nwowim kima dinokninkin sima kirie rani, kimiir hiriinan mi simiirin sibgu kigrirao. Dimusi rani, kima mi sima kima iriparin mhoiya dimin miyik Adi Komii siya hauwi wi simiirarar haiswowi mi kima hiriinan siyu iir tiri mi kimiir siyuin wi dimin whirki haiginikou rani, Adi Komii siiram srii dimin taemin haiyam. Nningaka. Iriig.

**Kima iikamim hiinsima dwo mi ti dimin taemin  
miyikim simiir sibgu wakaeyokna ap**

<sup>8</sup>Mi ta kariir yaimirsim kwiruha pi kimiir boinmauugi kima kwoin whiruha dwo mi irni nwirnyiam daingwokwonanae mi simiirsi daingwoyimyok iya sima hik haiyim mi dimin miyik miyik imiirar tir, irni nwirnyin mi hiniina daingwo nhirim sima dwo kimiir kouwin. <sup>9</sup>Mi iikamim sima dimin biye kimiir diriraerari mi kima simiirin dimin biye yamdi kipi swoki diriraerar. Mi sima yai biye kimiir boini mi kimiir tirbumbuwi mi kima simiirin yamdi kipi swoki tirbumbu. Mi kima Adi Komii krimiir Wanin siirim srii siya dimin miyik tirim simiirin. Dimusi rani, Adi Komii siya hiniina naingwokin kima ti hiniina tirim mi kima siir dimin miyik miyik imiirin wa haii. <sup>10</sup>Kima ti hiniina ti diriraerar. Dimusi rani, Adi Komii siir yayim Yokwo Komii saiir nwowim hiniina boinkim:

Ti iikam nhirim yipiki ii miyik nhir nwowam naingwowim ti nu iirin, sima dimin taemin biye imiirin digumii haimriiyugig mi nksisae yayim yim iripi wara. <sup>11</sup>Sima dimin bibiyie imiirin digumii haimriiyugig mi dimin miyik miyik imiirar timi tir. Sima iikam whiekakim simaka hiinsima dwo. <sup>12</sup>Dimusi rani, Adi Komii siya iikam miyik miyikim simiirar kigriraowikin yipiki simiir kwoinim miyik nwowim mi siya dimin taeminim sima sriiyim siirim simiirar wakaeyoknaeikin. Mi Adi siya iikam biyeyim digumii simiir haimriiyuwikim.

<sup>13</sup>Mi kira wadie tiram naingwowi kiriir kwoinin wi nhinga tirbuwi inkam nwir kamaeka. <sup>14</sup>Mi kima dimin miyik tiri mi iikamim sima kimiirin dimin biye tiri mi kima maigimaigra taokitaoka dwokaeyam. Mi kima iikam imiirsi kipi nidid mi ti dimin taemin imiirsi kipi naingwo yimyok. <sup>15</sup>Kima Krai siiram daingwokwonanaei mi kimiir kwoinim siirramar daingwo iski yo dimin prasae rani. Mi inokiinokin kima iikamim kimiir srii yamim simiir yai imiir nowarkii boinam dwokwokin kimiir kwoinim dimin taeminim Adi Komii siirim simiiram dimuim naingwo tibmii? Mi kima simiirin io kwoin kipi nwo mi igao yai kipi mi boin Adi Komii siirsi didid yo wi inig biyekak kima nwowisi. <sup>16</sup>Mi kimiir kwoinim maigimaigra dwo dimin taeminim kima tiriyim mi kimiir kwoinin wi rirmiigrirmiya niki owim. Mi ta

saiir mhoyiya iikamim sima wi kimaka ninkinwamwarkii boini ti dimin miyikmiyikim kima tiriyim simiirsi. Dimusi rani, kima Kraiis siiram naingwo tibmiigim mi sima wi nididgak nwonami dimin taeminim sima boinim simiirsiyin. <sup>17</sup>Mi kira iikam imiirin sibgu sibgu tiri, iiya ti iikamim sima dimin biyeyar tirka windi kimiirin mi mhoyiya Adi Komii siya kimiiramin wi big nasmirwaiyar nwowi. Mi kima iikam imiirin dimin biyie tiri mi yim ti iikamim kimiirin wi iriipi hiriinan dimin biyeyar swoki kwatiri mi Adi Komii siya kimiiramin wi big nasmirwaiya nwo rani. <sup>18</sup>Tariigina ya kamwowairga. Dimusi rani, Kraiis siya bidi yaowin, siirin kam bibiyeyim sima tiokin mi ta siya naowa krimiir dimin taemin bibiyeyim simiirsi naokin, siyairgin inkam miyikin dimin whirki kimbu karamae nwowin, siya iikam biyie krimiirsiyin kwiruwar naokin mi ta hiriinan sairsika siya krimiir asi nanmaiwarkainakin Adi Komii siiram namim. Ti inkamin siyairgin piuarigi naowin mi siir kwoinbudin wari bi naokin ini omwaiya swoki waiyan. <sup>19</sup>Mi ti hiriinanin Adi Komii siir naeyiuin Kraiis siya maeyau biyeya kwoinbudgim nwowa saiir yam mi siya siir yai aiarar yanaakninkii haiginiu simiirin. <sup>20</sup>Mi Adi Komii siya ti iikam imiiramin minam nwogugugin iiya sima omwaiyar niki waiya sima siiram naingwo tibmiyim mi sima siir yai aiar bi wakaeyoknakim iiyim Noa siya miriyim siyaii aiar. Mi ta ti aiarin Adi Komii siya wikamim iriyar oumuar hainaowid mi tiriginim sima bi naokin. Dimusi rani, op komiyyin simiir wari bi nwomairipu aokin. <sup>21</sup>Ti opin yi iikamim yipiki baptaisiyim aknainan simiir niisiimauugin. Taka opa saeya iowim kimiir piu nwowim simiir hiisokan tani. Niingaka. Ya min niisiimauuga iikamim yipiki Adi Komii siiram sruiyim simiir dimin biyie imiir haiyoprimdiyumiigiyim mi siya wi simiir kwoin imiir diriraerarki rirmiya nwokiyim. Dimusi rani, Jisis Kraiis siya bidiyar iki aonamin mi siya ha swoki insiin idwowin mi ini omwaiya swoki waiyan. <sup>22</sup>Kraiis siya bidi yamin Adi Komii krimiir Wanin siir om iir mi siya ini Adi Komii siir ina inig miya ini idwokaiyiun maeyauwa iikamim inigakim sim nidwokaiya saiir. Mi paekwosim ima mi nonkwo yiu ikim mi uridyiu bibiyie whiekak ikim simiir kouwin ini siyar ywowiskiyin. Iriig.

**Dimin taeminim kima diriraerariyim Adi  
Komii siir kwoin iirara daingwo tir**

**4** <sup>1</sup>Kraiis siya inkam krimiir hiriinanar naokin mi ta hiriinan sairsika kima biya siya tirim simiir ti swoki aingwoyokiyokiigi mi siya ini inkam biyeyim simiirar kigninkin tiotin siirin sima siir nonkwobumbuninkinim mi inkamki kimiir tiowi mi kimpisu kimiir hauwi yi ti hiriinanin, dimusi rani, kima Adi Komii krimiir Wanin siir yai aiarim naingwo tibmiigim, yim ti dimin taeminim ini wadie mi owim whisarii rani, iikamim yipiki inkamki tiowiyim simiir piuim mi

ha kimpipisuwiyim mi ti hiriinan siyiuin yio simiir grabainginiuwi ti hiriinan dimin biyeyin sima tiriyim simiir haiburgigim. <sup>2</sup>Mi tariinan kima diminim kimiir kwoinki naingwowim ta iya kima nu tirar niki owa simiir kipi wakaeyokna diriraerar. Mi kima Adi Komii siir kwoin iirara wakaeyokna ap iski. <sup>3</sup>Ti nhirim biya namkiyim krma dimin biye kasa bi diriraerarkim iikamim nuanim sima tirim simiirin ti dimin taeminim yim hiniingim: Krma dimin biye imiirar wakaeyokna apkim mi krma simiir diriraeraramin nhaminhami bi naingwokim, krma hii nanaeyim krma siyu komii iirar taouga diriraerari, krma op kiriekiriyim simiir kwiyaeiyim iki krma kwiyae nanaeyim mi krimiir puim pi whaowakakar nwowi mi krma nae pranaepranae bi naeikim mi krma iki iikam nhirim simiir omakar mi amikim op kiriekirie imiir kwiyaeiyim mi krma digiumii Adi Komii siir yai aiir haimriiyugim mi krma pi uruwai siyaowaiyim simiir inig imiirar mi hainani. <sup>4</sup>Mi tariinanin iikamim yipiki ti dimin taemin imiirar niki tirkipkaiyim sima ini hindara yanaakiyim. Dimusi ran, i siyu biye simaka tir karamae nwowin mi sima kimidiniya yai bibiyie kimiir boin, nididgak kima nwowim <sup>5</sup>mi ta saiir mhoiiyarin iya Adi Komii siya iikamim omwaiyar niki waiyam mi naokaowim simiir hidi mi ti iikamim sima wi sima simar nanaakninkiinaei sima ti hiriinan dimin taemin biyeyim simiir dimusi tirkim mi ta hiriinan saiirsika Adi Komii siya simiirin asi nonkwobumbuninkini. <sup>6</sup>Mi ta hiriinan saeya, Krai siya siir Yai Win Kibiya iikamim yipiki omwaiya waiyam mi iikamim yipiki biya naokaowim simiir boinmimauuim biya Adi Komii siya boinkiya hiniin iikam whiekakim wa naokaowi. Krai siya hiriinansi boinkin ti yayim iikamim yipiki biya naokaowim sima wa wakaei mi wa naingwo tibmiir siir yai imiirimin mi mhoiia sima wi Adi Komii saika nwowi. Iriig.

#### **Kima dimin miyikim Adi Komii siya hauwiyim simiirin sibgu kigrirao**

<sup>7</sup>Mi iikam ima mi dimin taeminim yipiki ti nu iir nwowim sima ini kingiinar nwowim wa nidwomai. Mi kima sibgu daingwo omok mi kimakimasiyar kigriraona dimin taeminim kima tiriyim mi kima Biyan Inkam Komiiyin nhwo siiramin sibgu kwisboin. <sup>8</sup>Ti diminin yio prasae rani, ini iki dimin taemin nhirim kima wakaeyokna apiyim ini simiir kou ywowin. Kima irni nwirnyam naingwokwonanaei. Dimusi rani, yio tiriiginin kimiir whinkinsis haiginiuwi dimin biyeyim iki iikam nhirim sima diriraerariyim kimiir simiirsi naingwoyimiyoiksi. <sup>9</sup>Mi kima iki iikam nhirim naingwo tibmiiyim yipiki kimiiram nitiyim kimaka nini oniyim simiirin sibgu kigrirao mi nae minim mi whwonkai hii ikim mi dimin taemin nhir ikim mi ti dimin hiriinanin simiir sibgu diriraerar haiginiu mi kima kimiir kwoinim io kwoin kipi naingwo simiirin mi ha kipi diriraerar. <sup>10</sup>Mi ninokninkin komiia Adi Komii siya priihauugiya kimiir

wim kima iki iikam nhirim simiir whinkinsiis haiginiu mi ta hiriinan sairsika kima wi Adi Komii siir diminpai diminpaiyim kimiir hauuim wi simiir sibgu kigriraowan iikam nwowi. Yim hiniingim, <sup>11</sup> iikamim yipiki yai kimiir boinmimauwi mi sima Adi Komii siir yaigiyai imiirara boinmimauw iski. Mi yipiki dimin taeminim iikamim simiir whindiriraerari Adi Komii siir kirieni mi ta hiriinan sairsika iikamim Adi Komii siir inig iirin wa nwoki hainanim. Dimusi rani, Krai Jisis siya whindiriraerarkiya kimiir sairsika. Mi kara ha naingwowi iikamim siir inig iir hainan, siyairgin inig komiigakin mi pi siya kigriraowi iikamim nu tiranim mi dimin taemin whiekak ikim iinokiinokin. Iriig.

**Kima kipi naingwoyimiyok, ti dimin biyeyim kimiir  
tirbumbuim sima Krai siir bidiyar iki tirim**

<sup>12</sup> Ti kariir nomiyau kinim kima kipi nanaawin ti hiriinan hik kimpipisuim iikam kimiir nimbiniyim yim kimiir kinankiuim mini mi sima wa nwoki kigim kima ini Adi Komii siir sibgu wakaeyokna apim, kimiir kwoinin ha naingwowi ti dimin biyeyim biya bi nimbiamkim mi ta saeya ninkakniya. Niingaka. Biyyin Krai siir bidi yimbiamim. <sup>13</sup> Mi kima maigimaiga dwo kima Krai siir hiriinan nwokim dimin biye kimiir nimbiniyim. Dimusi rani, mhoiia iya Krai siya swoki iti, siya, wi siya siyar nanaakninkinaei mi kima wi maigimaiga taokitaoka saika nwowi. <sup>14</sup> Mi iikamim wi yai bibiyie kirie kimiir nikbumbu boini. Dimusi rani, kima Krai siiram naingwo tibmiikim mi kima maigimaiga dwo. Dimusi rani, Adi Komii siir naeyu kirieyin ini kimakar nwowin. <sup>15</sup> Mi kima siyu biye kipi tir mi gavman siir miyan iikamim kimiirin wi sima nonkwobumbuninkin haiginiuwi ti siyu biye hiriinanin kima tiriyin siirsi. Yim hiniingim, inkam min nisomsom aokao mi hii min tauae mi siyu bibiyie iikam nhirmi tir mi kira ha naingwowi iki iikam nhirim simiir kouwin ini kirar ywowin mi simiir digworaekwowim yim ini kirar mi kigriraowim mi ti hiriinan diminim yim kipi tirmimin. <sup>16</sup> Mi inkamin iikam biyeyim dimin biye tiriyim sima wi kirir tirbumbuninkini. Dimusi rani, siya Adi Komii siir yai aiir wakaeyokna apikin mi siya simiirsi kipi nidid siya Adi Komii siir inig iirar hainan. Dimusi rani, siya Adi Komii siiram naingwo tibmiikim.

<sup>17</sup> Mi ta iya bidi yimbiniya Adi Komii siya iikam imiir hidana. Mi siya biyyin wi iikamim yipiki siir yai aiir wakaeyokna apim wi simiir hidi. Mi siya biyyin iikamim naingwo tibmiiyim krimiir hidi mi mhoiia wi paniina tiri iikamim yipiki digiumii Adi Komii siir yai kibi aiir haimriiyuim simiirin? Simiirin wi siyar nonkwobumbuninkin iuguskii. <sup>18</sup> Mi Adi Komii siir yayim Yokwo Komii sair hir nwokaiyim yim hiniina boinkim,

Mi iikamim yipiki naingwo tibmiiyim mi ti dimin biyeyim ha  
nimbiamim hik simiir hauuwam mi simiir kwoinin pariiparii

sima nipiyaokiiyim Adi Komii siir wakaeyokna apsi, mi ti dimin biyieyim ti iikamim Adi Komii siiram wakaeyokna apiyim simiir kwoin imiir kiyaiyamim pariipariiya nwowi, mi ti iikamim yipiki digiumii Adi Komii siir haimriiyuim yim wi paniin paniina tiri, ha? Yim wi hindara nasae borninopkainam iuguskii.

<sup>19</sup>Mi ta hiriinan saiirsika, ti iikamim yipiki dimin bibiyieki kiyikaigaiyim mi hikak ha nwowim, yim Adi Komii siirar kwoinkin ti hiriinan nimbiyamim mi sima kipi naingwoyimiyo. Mi Adi Komii siiram daingwo tibmii yipiki iikam whiekak krimiir nonkwokwokiyein mi siya simiir whindiriraerarin mi simiir mi kigriraokin. Dimusi rani, siya dimin taeminim biiya siya boinim, siya diriraeraram, siya simiirin wa diriraerari. Iriig.

**Kima adiyaowae iikamim kima Adi Komii siir  
piuganan iikamim simiir sibgu kigrirao**

**5** <sup>1</sup>Mi ta hiriinana saiirsika, iikamim Adi Komii krimiir Wanin siir piugananim iki iikam nhirim simiir kigriraowiyim kara kimiirin hiriinansi boinonkwokwoki. Mi kara iriipi hiriinan inkam adiyaowaeyairgin kimiir hiriinan mi karar kigin Kraisiya naonamin. Mi kara wi siyaka boinaii dimin taemin miyik miyikim mhoiia Adi Komii siya nanaakninkiiyanim. <sup>2</sup>Kara kimiirin tisa boinonkwokwokiyein kima iki Adi Komii siir iikamim sibsibnanim yipiki kimaka waraur nwowim simiirin sibgu kigrirao. Kima sibgu kigrirao Adi Komii siya naingwowin kima tiram siir hiriinan. Dimusi rani, kima wi kipi diriraerar dimin taeminim, sima kimiirin hiniina boini ti hiniin diminin siir ti diriraerar. Niingaka. Kima simiir tiri. Dimusi rani, kimiir kwoinim simiir diriraerarin naingwokim kima simiirin minam kipi diriraerar umir komii haiyim, kima simiirar diriraerar. Dimusi rani, kima simiirin niinginiinga tiramar naingwokim. <sup>3</sup>Kima iikamim Adi Komii siya nokmwim okwo haiginiuwim kima, kimamar kipi naingwona hiniinin kouwin ini kimar ywowim mi simiirin kimar nokmimin tir dimin taemin tiramin. Niingaka. Wim kima ini aknainan ywowim iikamim warauranim simiir niisiimauuwam dimin taeminim sima kigna apam. <sup>4</sup>Mi mhoiia iia Jisis Kraisiya krimiir kigriraowi inkam komiyein siya swoki iti, siya wi siya siyar nanaakninkiinaei mi kima wi saika ninkin haii dimin taemin kibikibiyim iinokiinok nwoyokiyokiiyim kigugu karamae nwowiyim. <sup>5</sup>Mi ti hiriinan siyeu kamwowin kara pi yainan whranim kimiir boinonkwokwoki, kima iikamim yipiki kimiir kigriraowiyim simiir yai imiir sibgu wakaeyokna ap kima whiekakarim irni nwirni yai wakaeyokna. Dimusi rani, Adi Komii siir yayim Yokwo Komii saiir nwowim yim hiniina boinkim, Adi Komii siya iikamim yipiki ha naingwowim simaairgin inkam komiikomiiyim, siya digiumii simiir haimriiyugin mi siya ti

iikamim yipiki simamar naingwona karamae nwowiyim siya wi simiir whinkinsiis haiginiuwi. <sup>6</sup>Dimusi rani, yaiya Adi Komii siya boina sairsika, kima ha daingwo Adi Komii siya inig komiigakin mi kima kimamar kipi naingwona mi kima siir yai imiirar wakaeyokna ap mi ta saiir mhoiiyarin iya siya nimbina siya kimiirin wi wadeyar whindiriraerar haiginiuwi mi kima wi kiriekikirieya nwowi. <sup>7</sup>Mi ti dimin taeminim kima naingwoyimiyokim kimiir kiyaii, kima ti dimin taemin imiiramin Adi Komii siiram srii siya whinkinsiis haiginiuwim kimiirin. Dimusi rani, siya kimiiram naingwokwonanaei mi kimiirin wi siyar kigriraowi.

<sup>8</sup>Kima sibgu mintirao mi kimasiyar kigriraona. Kimiir sau omoman inkamin Setan siya ini wraisu komiyyin yipiki laion dapiyin ini siir hiriinan ywowin siya hinda tinda pa napririr kaowi iki wraisu nhirim simiir pisomsom aokaowim. Setan siir siyiuin hiniingin, siya hinda tinda pa napririr kaowi iikamim simiir nipiyaokiiyim sima digiumii Adi Komii siir haimriiyugigim. <sup>9</sup>Kimiir kwoinim kirie hiriyyar dwokripkai mi digiumii Setan siir haimriiyu mi ta hiriinan sairsika kima iikamim yipiki Adi Komii siir yai imiir wakaeyokna apim. Dimusi rani, kima ina ninokninkinim iikamim yipiki Adi Komii siir wakaeyokna apim hinda tindanim, dimin biyeyim wi simiir tirbumbuwi kimiir tirbumbuni haniin aka mi kimiir kwoinim kirieya dwo. <sup>10</sup>Mi ta iya kima hik kimpipisu haii saiir mhoiiyarin Adi Komii sikisiyairgin yipiki dimin taemin miyyik whiekakim simiir bwamkibwamin. Mi siir dimin miyyikmiyyikim wi kimiiram nimbini kima haiyim mi kima wi Kraiis saika nwoyokiyokiikaeyami inokinokin. Mi kimiirin wi miyyik Adi Komii siya siyar nwowaiginiuwi mi wi siya kirie haiginiuwi mi kimiirin wi siyar mi whindiriraerar haiginiuwi. <sup>11</sup>Kara ha naingwowi Adi Komii krimiir Wanin siya digworaekwo whiekakim simiirar kigirkaki inokiiinokin. Iriig.

### **Mi kara pi yaimirsisim nhirim simiir swoki boinki**

<sup>12</sup>Ti inkamin Sailas nikiuwiyyin yipiki kara naingwokwonanaeyin, siya whin win haiginiugika ta yokwo mirisima kara kimiir boinonkwokwokiya mi kara ta yokwowa minam winkika kimiir niisimauuim ta yaiya kima naingwo tibmiiya yim Adi Komii siirgisiirar yaigim. Mi kimiir kwoinim kirie dwo mi simiir wakaeyokna ap.

<sup>13</sup>Mi kima iikam naingwo tibmiiyim yipiki om Babilon hir nwowim yipiki Adi Komii siya nimbiniim siirim simiir wakaeyokna ap mi sima mi Mak siya yipiki kariir yinisimkiiinanin kanaka wakaeyokna apiyin Adi Komii siir, simiir nokboinmamaira kimiiram hauugika. <sup>14</sup>Kima iikam whiekakim yipiki kimiir nomiiyauim naingwo tibmiiyim simiir kigi mi simiirin dankabmamaer mi dokboinmamaer haiginiu.

Mi kara ha naingwowi kima Kraiis siir iikam whiekakim kwoinin iripa nongwomamaer aeyin siir bidi haiyin. Iriig.